

# LaKadarma

Nava ~ Asturias



*Banda de Gaites LaKadarma nel Festival Interceltique de Lorient (2015)*

## ¿Qué ye LaKadarma?

LaKadarma ye un nuevu proyeutu musical que porfia pol desendolcu de la música tradicional asturiana apurriendo-y nueves sonoridades y arreglos a la gaita asturiana recibiendo pa ello influencies de distintos estilos.

L'agrupación, que se forma'n febreru de 2012 baxo la direición musical de los hermanos Rodrigo y Andrea Joglar, compónse de músicos procedentes d'estremaes estayes de la

música tradicional asturiana, tanto del mundu de les bandes de gaites, como de los grupos de música folk, amás de gaiteros solistes o escolinos de la Escuela Municipal de Música de Nava.

Nes sos actuaciones, LaKadarma trata d'ufir un espectáculu desenfadáu, espontáneo y dinámicu, al traviés d'un repertoriu compuestu de pieces de composición tanto d'autores destacaos del panorama musical asturianu como de los propios direutores de la banda, amás de pieces tradicionales o adautaciones de melodíes contemporánees.

## ¿Qué instrumentos usa?

LaKadarma emplega gaites asturianas d'un roncón afinaes en Do y un cuerpu de percusión formáu por caxes d'alta tensión, timbales y bombu, anque tamién usa dacuando otros instrumentos de percusión como'l caxón flamencu, tambor asturianu o batería.

Rescampla tamién l'enfotu de l'agrupación por explotar al máximu les posibilidaes musicales de la gaita asturiana, siendo la primer banda de gaites d'Asturies n'usar punteros afinaos na tonalidad de Sol, amás de roncones en diferentes afinaciones.

Nesti sen, LaKadarma pretende seguir una llinia de trabayu na que se porfie pola investigación y el desendolcu de la gaita collaborando con varios talleres de luthería del país y de la so contorna na preba de posibles innovaciones que permitan algamar los meyores resultaos a nivel musical.

## Indumentaria

LaKadarma vístese con traxes tradicionales asturianos, basaos en reproducciones de los emplegaos nel país nel sieglu XIX y ellaboraos con materiales naturales.

Amás d'ello, la banda dispón d'una indumentaria non tradicional pa actuaciones que nun requieran l'usu del traxe asturianu.

## Web y redes sociales

Pa seguir más de cerca les actividaes y noticies alrodiu de la banda, LaKadarma pon a disposición del públicu la so web oficial [www.lakadarma.com](http://www.lakadarma.com), onde se puede conocer toles novedaes, ver semeyes, videos o mercar los nuestros productos oficiales.

Tamién puedes seguinos al traviés de [Twitter](#) , [Facebook](#), nel nuestro canal de [Youtube](#) y [Instagram](#).

## Dirección musical

De cara a ufrir una la mayor bayura y riqueza nos sos arreglos, LaKadarma optá pa la organización de los sos ensayos por una fórmula de coodirección a nivel musical, con un grupu de cuatro persones coordinaes por Rodrigo Joglar, que comparte la dirección de la banda cola so hermana Andrea na seición de gaites, Borja Cayado na seición de caxes y Leticia Cernuda na seición tenor.

Ye perimportante sorrayar tamién la importancia del restu de componentes, que collaboren tantu na composición de partituras dacuando como na escoyeta del repertoriu.

## Actuaciones

LaKadarma tien actuaos en dellos de los más importantes festivales de bandes n'Asturies :

- Encuentru de Gaiteros San Roque de Llanes y Festival de Bandes de Gaites "Villa de Ribadesella – Memorial David Mateos" Ribeseya en 2012.
- Festival de la BG Xácara d'Uviéu 2013.
- Festival de Bandes de Gaites de Castrillón y Alcuentru de Bandes de Gaites Arcu Atlánticu de Xixón en 2014.
- Festival de Bandes de Gaites Villa de Candás y Festival Internacional de la Gaita de Villaviciosa 2015.

Fuera d'Asturies tien fecho actuaciones en festivales tan prestixosos como'l Festival Interceltique de Lorient en 2015 nel que rescampa la colaboración ente la banda y los grupos bretones Alambig Electric y l'Usine a Canard.

LKDM tamién tien participao nel I Concursu de Bandes de Gaites Asturianas *Arcu Atlánticu* en 2013 algamando'l tercer puestu y el I Campeonatu de Bandes de Gaites Conceyu de Villaviciosa en 2014 algamando tamién el tercer puestu.

Aparte d'ello tien tocao en munches fiestes y actos tanto en Nava como na redolada y otros conceyos del centru y oriente asturianu.

La Banda de Gaites LaKadarma asina mesmo entama tolos años les Xornaes de Música Tradicional de Nava que pretenden acercar a Nava actuaciones de dellos estilos dentro de la música tradicional, folk y de bandes de gaites del más altu nivel.